

## DOMINGU XV TEMPU KOMÚN – TINAN A

### Tema

Liturjia Domingu ne'e nian konvida ita atu hola konxiénsia kona-ba importánsia Maromak nia liafuan nian no sentralidade ne'ebé nia tenke asume iha sarani sira nia moris.

*Leitura dahuluk* garante ita katak Maromak nia Liafuan fekundu no kria moris. Nia haraik esperansa mai ita, hatudu mai ita dalan ne'ebé ita tenke halo no haraik korajen atu ita intervein iha mundu. Nia nafatin efikás no nafatin prodús efeitu, maski dalaruma la atua tuir ita-nia interese no kritériu sira.

*Evanjellu* propoin mai ita, uluknanai, reflesaun ida kona-ba forma oinsá ita simu Liafuan no husu ita atu sai “rai isin”, disponivel atu rona Jezús nia proposta sira, atu simu no atu husik nia fó fuan barak iha ita-nia moris loroloron nian. Nia garante mós katak “Reinu” Jezús propoin mak realidade ida kompara-laek, iha ne'ebé sei hatudu sai ninia glória tomak no fekundidade Maromak nia moris nian.

*Leitura daruak* apresenta temátika ida (solidariedade entre ema no kriasaun seluk). Maromak nia Liafuan mak fó kritériu sira atu ema bele moris “tuir Espíritu” no atu bele harii “lalehan foun no rai foun” ne'ebé ita mehi.

### LEITURA I – Is 55,10-11

Deutero-Isaías, autór testu ne'e nian mak profeta ida ne'ebé hala'o ninia misaun entre judeu sira iha ezíliu Babilónia nian, hodi buka konsola no mantein moris esperansa iha povu terus no deziludidu ida nia leet. Kapítulu sira ne'ebé halibur ninia mensajen (Is 40-55) hanaran “Livru Konsolasaun nian”.

Iha parte dahuluk livru ne'e nian (kf. Is 40-48), profeta haklaken ba ema sira iha ezíliu libertasaun husi dadur no “ézodu foun” Maromak nia Povu nian ba Rai Prometida; iha segunda parte (kf. Is 49-55), profeta ko'alia kona-ba rekonstrusaun no restaurasaun Jerusalém nian.

Versíkulu tolu ne'ebé leitura dahuluk ohin nian propoin mosu iha finál “Livru Konsolasaun nian”. Konvida tiha Povu (ne'ebé sei hela iha Babilónia) atu buka no invoka Na'i (kf. Is 55,6-9), profeta fó hanoin hikas Maromak nia Liafuan nia efikásia ne'ebé foin haklaken ba ema sira iha ezíliu (kf. Is 55,10-11).

Ita iha faze finál Ezíliu nian (entre tinan 550/540 mK). Komunitade ne'ebé iha ezíliu baruk ona ho liafuan furak sira no promesa sira libertasaun nian ne'ebé kleur loos atu konkretiza... Impasiénsia, dúvida, setisizmu neineik-neineik hamenus rezisténsia no fiar... Karik Maromak haluha tiha ona ninia Povu?

### MENSAJEN

Profeta hateten katak Maromak la haluha ninia Povu. Ninia Liafuan sei konkretiza, basá Maromak fiél nafatin ba ninia promesa sira. Maromak nia Liafuan efikás, transformadora, jeradora vida nian. Nia nunca falla.

Atu espresa ideia efikásia Maromak nia Liafuan nian, profeta utiliza ezemplu udan no neve nian: hanesan udan no neve ne'ebé tuun husi lalehan haburas rai no multiplika moris iha to'os, nune'e mós Jahwéh nia Liafuan sei la husik atu halo tuir no kria moris nakonu ba

Maromak nia Povu.

Ilas ne'e sujestivu tebes. Ilas ne'e tenke fó hanoin ba judeu sira desterra iha Babilónia kona-ba udan ne'ebé monu iha norte/tasi-feto Israel nian no neve iha foho Hermon. Bee ne'ebé monu husi lalehan ne'e mak hakonu mota Jordão; no mota ne'e halai iha rai sira Israel nian, hodi hamosu moris no fekundidade.

Maromak nia Liafuan mak bee kmanek husi lalehan ne'e, ne'ebé sei fó moris no habiit Maromak nia Povu.

## **LEITURA II – Rom 8,18-23**

Paulo oferese katekeze kona-ba dalan ne'ebé tenke tuir atu simu salvasaun, don ida Maromak nian, don gratuitu, mai husi Maromak nia bondade no domin (kf. Rom 3,1-5,11). Salvasaun to'o mai ita liuhusi Jezús Kristu (k. Rom 5,12-8,39); no atu iha ita liuhusi Espíritu ne'ebé Jezús hasuli iha ema sira ne'ebé adere ba Ninia projetu no tama iha Ninia comunidade (kf. Rom 8,1-39).

Molok ne'e, Paulo haktuir tiha ona (Rom 8,1-17) katak, sarani sira tenke tuir Kristu nia ezemplu ne'ebé implika husik moris “tuir isin” (egoíзму, foti-an, autosufisiénsia) no adere ba moris “tuir Espíritu” (rona no obediénsia ba Maromak, saran an ba maluk sira).

### *MENSAJEN*

Tuir Paulo, la'ós ema de'it mak iha interese atu ema halo opsaun ba moris “tuir Espíritu”: kriasaun tomak depende ba ema nia hilin sira. Ne'e katak sá loos?

Nu'udar rezultadu ema nia salan, kriasaun tomak monu ba egoíзму no dezorden nia ukun (kf. Gn 3,17) no monu ba mate nia liman. Se ema adere ba Kristu no moris “tuir Espíritu”, nia sei supera destinu malisan no mate nian mai husi salan; entaun, kriasaun tomak sei hetan libertasaun no sei moris mai lalehan foun no rai foun. Ne'e mak tema solidariedade nian entre ema, balada seluk no natureza, ne'ebé ita hetan iha Bíblia (kf. Gn 9,12-13; Col 1,20; 2 Pe 3,13; Ap 21,1-15).

Tanba ne'e mak kriasaun tomak hein maka'as atu ema hili moris “tuir Espíritu”. Ema Foun no Lalehan no Rai Foun moris liuhusi difikuldade no terus. Tanba sá? Tanba moris “tuir Espíritu” husu renúnsia ba egoíзму, ba interese aat sira, ba komodizmu, ba loko-an. Paulo uza mós ilas terus baihira tuur-ahi oan ida atu leno mensajen ne'ebé nia hakarak tranzmite. Labarik moris liuhusi terus; terus ne'e mak dalan obrigatóriu ba moris foun, moris iha Espíritu.

Maibé terus sira, difikuldade sira, renúnsia sira ne'e la folin buat ida kompara ho ksolok rohan-laek ne'ebé sarani sira hein atu simu iha dalan nia rohan.

## **EVANJELLU – Mt 13,1-23**

Domingu ohin no domingu rua ne'ebé mai, Evanjellu apresenta mai ita Jezús nia aiknanoik/parábola sira. “Aiknanoik” mak ilas eh komparaun ida, atu apresenta mensajen eh hanorin ida.

Linguajen aiknanoik nian la'ós Jezús mak inventa, maibé halo parte linguajen baibain iha literatura Povu sira Médio Oriente nian: karakterístika eh jéniu orientál gosta liu ko'alia no hanorin liuhusi ilas, komparaun no alegoria, duké liuhusi diskursu lójiku, malirin no rasionál, típiku ba sivilizasaun osidentál.

Linguajen parábólika soi vantajen oioin kompara ho diskursu lójiku no impozitivu.

Uluknanai, tanba ilas eh komparasaun ne'ebé karakteriza linguajen parabólika iha forsa komunikasaun no kbiit evokasaun nian ne'ebé riku, liufali espozisaun teórika: nia kle'an liu, nakonu ho sentidu, evokadora, kona liután ouvinte sira nia fuan. Daruak, tanba ne'e mak kilat ida kontrovérsia nian: linguajen ho ilas lori interlokutór atu admite pontu ruma ne'ebé, liuhusi dalan seluk, nia nunka fó konkordánsia. Datoluk, tanba nia mak métodu pedagójiku loos ida, hanorin ema atu refleto, atu sukat pró no kontra sira, atu hetan solusaun ba dilema sira ne'ebé vida apresenta: hamosu kuriozidade, babukak, konvida atu deskobre lialoos.

Iha kapitulu 13 ninia Evanjellu nian, Mateus apresenta mai ita aiknаноik hitu Jezús uza atu revela ba dixípulu sira realidade "Reinu" nian: "aiknаноik Reinu" nian.

Husi aiknаноik hitu ne'e, tolu mai husi tradizaun sinóptika (ema ne'ebé kuda fini, mostarda musan, fermentu); haat seluk (trigu no duut aat, rikusoin ne'ebé subar, fatuk murak, dai) ita la hetan iha Marcos no mós iha Lucas. Provavelmente, mai husi fonte antiga Jezús nia "Liafuan sira" ne'ebé Mateus uza maka'as atu hakerek ninia Evanjellu.

Evanjelista Mateus nia preokupasaun mak nafatin ninia comunidade nia moris. Husi aiknаноik hitu ne'e ita bele haree bibi-atan ida nia preokupasaun atu ezorta, anima, hanorin no habiit ninia sarani sira nia fiar.

## *MENSAJEN*

Aikananoik ema ne'ebé kuda fini no fini mak Jezús nia aiknаноik ne'ebé ema koñese liu no mós emblemátika liu. Maibé testu Evanjellu ohin nian la apresenta de'it aiknаноik. Testu fahe ba parte tolu: aiknаноik (vers. 1-9), Jezús nia "liafuan sira" kona-ba funsaun aiknаноik nian (vers. 10-17) no esplikasaun aiknаноik nian (vers. 18-23).

Iha parte dahuluk, ita lee aiknаноik (vers. 1-9). Kuadru ne'ebé apresenta hatudu téknika agríkola uza iha Palestina tempu ne'ebá nian: uluknanai, agrikultór kari fini ba rai; hafoin mak nia fila rai. Nune'e ita bele komprende tanba sá mak fini balun bele monu iha "dalan ninin", balun iha "fatin ho fatuk no la iha rai" no balun iha "ai-tarak nia leet".

Evidentemente, diferenza rai nian iha komparasaun ne'e signífika diferenza oinsá simu fini. Maibé buat ne'ebé sentru aiknаноik nian no signífikativu liu mak kuantidade boot ne'ebé prodús husi fini ne'ebé kari iha "rai isin"... Se ita konsidera katak iha époka ne'bá, fini ida fó fuan hitu barak ona, fini ida fó fuan atus ida, neenulo no tolunulo ne'e buat ruma sorprendente, ezajeradu, milagrozu...

Mateus koloka parábola ne'e iha kontestu ida iha-ne'ebé ema la simu Jezús nia proposta. Sidade sira bee-lihun nian (Corozaim, Betsaida, Cafarnaum) la simu Ninia pregasaun (kf. Mt 11,20-24); farizeu sira ataka Nia tanba Nia la respeita sábadu no hakarak oho Nia (kf. Mt 12,1-14); sira akuza Nia katak ninia obra sira la'ós hodi Maromak nia kbiit, maibé hodi Belzebu, demóniu nia ulun nia kbiit (kf. Mt 12,22-29); sira la fiar iha Ninia liafuan sira no eziye "sinál sira" husi Nia (kf. Mt 12,38-45). "Reinu" ne'ebé haklaken hetan kontestasaun boot no parese katak nia destinu mak frakasu boot ida...

Posivel liu katak aiknаноik ne'e Jezús apresenta iha kontestu "krize" nian. Ba sira ne'ebé hatudu dezánimu no deskonfiansa kona-ba projetu "Reinu" nia susesu, Jezús ko'alia kona-ba rezultadu finál boot, glória nian. Ho aiknаноik ne'e, Jezús dehan ba dixípulu sira ne'ebé lakon fiar: "korajen! Imi keta dezanima, basá apezárde aparente frakasu, "Reinu" mak realidade ida boot liu; rezultadu finál sei sai buat ruma sorprendente, furak, lebele imajina".

Iha parte daruak ita iha reflesaun ida kona-ba aiknаноik nia funsaun (vers. 10-17). Hahú ho dixípulu sira nia pergunta ida: tanba sá mak Jezús ko'alia ho aiknаноik?

Mateus haree iha aiknаноik sira okaziaun atu bele hamosu ho klareza, akollimentu ka rekuza ba mensajen ne'ebé Jezús propoin. Ne'e katak sá?

Aiknаноik sira apresenta proposta "Reinu" nian iha linguajen ne'ebé ouvinte sira komprende, no interpela sira; tanba ne'e, rona tiha mensajen apresenta liuhusi aiknаноik sira, ema ne'ebé

iha fuan toos de'it no mós la iha duni interese mak la simu proposta. Aiknanoik sira mak fatór desizivu: sira propoin ho klareza realidade “Reinu” nian. Ema ne'ebé simu mensajen ne'e, sei simu liután no “naresin”; maibé ema ne'ebé lakohi simu (maski mensajen hatudu sai momoos no asesivel), nia rejeita Jezús nia proposta no posiblidade atu integra iha comunidade salvasaun nian. Ba sira ne'ebé rejeita Jezús nia proposta, kumpre duni Isaías nia profesia: profeta ko'alia kona-ba povu ida ho fuan toos, ne'ebé hetok rona barak liután pregasaun profétika hetok sai hirus liután, hodi agrava ba beibeik ninia kulpa (kf. Is 6,9-10).

Dixípulu sira mak ema sira ne'ebé rona proposta “Reinu” nian no prontu atu simu nia. Tanba ne'e, sira komprende aiknanoik no aseita realidade ne'ebé propoin ba sira. Sira ema “haksolok”/rahun di'ak, basá loke fuan ba Jezús nia proposta, rona Ninia liafuan sira, haree no komprende Ninia jestu sira; sira “haksolok” tanba sira integra an ona iha “Reinu”.

Iha parte datoluk, ita iha esplikasaun aiknanoik nian (vers. 18-23). Parese esplikasaun ne'e la halo parte aiknanoik orijinál, maibé adaptasaun ida tempu ikus nian, atu aplika aiknanoik ba sarani sira nia moris.

Ita bele haree ho forma evidente katak esplikasaun desloka husi “sentru interese” nian. Esplikasaun la aprezena “Reinu” nia rezultadu finál boot maibé reflesaun ida kona-ba atitude oioin oinsá comunidade simu Jezús nia Liafuan (loloos, ida-ne'e mak preokupasaun boot comunidade sarani sira-nian).

Ba katekista sira ne'ebé prepara aplikasaun aiknanoik nian ida-ne'e, akollimentu Evanjellu nian la depende ba fini, la depende mós ba ema ne'ebé kari fini; maibé depende ba kualidade rai nian.

Ema bele ih aaitude oioin iha Maromak nia Liafuan nia oin... Balun iha fuan toos hanesan rai lurón nian: Jezús nia Liafuan labele tama borus rai ne'e no fó fuan. Balun iha fuan inkonstante, lalais atu iha entuziazmu maibé lalais mós atu dezanima iha difikuldade sira nia oin: Jezús nia Liafuan labele tau abut iha rai hanesan ne'e. Balun iha fuan materialista, ne'ebé nafatin fó prioridade ba rikusoin no sasán sira mundu nian: interese sira ne'ebé domina ema nia fuan fasil liu atu hanehan mate Jezús nia Liafuan. Maibé iha mós balun ne'ebé iha fuan disponivel no di'ak, nakloke ba Maromak nia dezafiu sira: sira simu Jezús nia Liafuan no nia fó fuan barak. Dixípulu loos Jezús nian (“rai isin”) mak sira ne'ebé rona aiknanoik sira, komprende no hakohak proposta “Reinu” nian.

Nune'e, ita iha ezortasaun ida ba sarani sira atu simu Jezús nia Liafuan, hodi la husik atu difikuldade sira, asidente sira moris nian, valór seluk hamout nia no halo nia sai fini estéril ida, lahó vida.